

## Z A P I S N I K

Sa 30-te redovne sjednice Skupštine Bosansko-podrinjskog kantona Goražde održane 17. novembra 2009. godine u sali Skupštine Bosansko-podrinjskog kantona Goražde sa početkom u 10:00 sati.

Sjednici Skupštine Bosansko-podrinjskog kantona Goražde prisustvuje 24 poslanika, i to: poslanici Stranke demokratske akcije: Begović Alija, Tafro Hasan, Dozo Hasan, Mulahmetović Mirsad, Halilović Adis, Ferhatović Jasmin, Obuća Bajro, Agović Adis i Borović Mensud, poslanici Stranke za Bosnu i Hercegovinu: Turčalo Mehmed, Adžem Memsur, Žuga Damir, Kumro Mesud, Omerbašić Jasmina, Podrug Salko, Rahman Ferid i Džemidžić Envera, poslanici Socijaldemokratske partije Bosne i Hercegovine: Bašić Redžo, Mujković Dževida, Frašto Emir, Imamović Ibrahim i Bilić Dragomir, poslanica Stranke radom za boljitak Milović Daliborka i poslanik Bosanskohercegovačke patriotske stranke – Sefer Halilović Terović Dževad.

Sa sjednice odsutan poslanik Socijaldemokratske partije Bosne i Hercegovine Kožo Mersudin.

Pored poslanika Skupštine Bosansko-podrinjskog kantona Goražde sjednici prisustvuju: Premijer Bosansko-podrinjskog kantona Goražde Uruči Nazif, sekretar Skupštine Bosansko-podrinjskog kantona Goražde Bašić Midhat, sekretar Vlade Bosansko-podrinjskog kantona Goražde Sijerčić Emir, ministri u Vladi Bosansko-podrinjskog kantona Goražde: Pleh Muhidin, Nedimović Vladimir, Janković Radmila, Sipović Nusret, Adžem Dževad, Delizaimović Alma, Imamović Demir i Kurtović Mustafa, predstavnici Njemačkog LOT tima, predstavnici OSCE-a, predstavnik CCI, predstavnici Ministarstva privrede: Sijerčić Rasim, Raščić Medžida, Omeragić Ismet i Muratspahić Meho, te predstavnici sredstava javnog informisanja.

Skupštinom Bosansko-podrinjskog kantona Goražde predsjedava predsjedavajući Skupštine Alija Begović, a zapisnik vodi Burhan Safeta.

**Begović Alija** – predsjedavajući Skupštine

Zapisnik sa 29-te sjednice Skupštine ste dobili. Otvaram raspravu. Da li ima primjedbi na zapisnik?

**Borović Mensud** – Nemam primjedbi na zapisnik sa 29-te redovne sjednice Skupštine, ali imam primjedbu na dopunu zapisnika sa 28-me redovne sjednice Skupštine. Ovo je klasičan primjer kako izgleda zapisnik kada se krši Poslovnik. U Poslovniku jasno kaže kako se izrađuje zapisnik i da se u momentu iznošenja diskusija skreće pažnja da one mogu biti unešene u cjelosti. Odredjene diskusije izlaze iz konteksta, tako da imamo slučaj da imamo repliku na diskusiju, a diskusije koja je proizvela repliku nemamo je u zapisniku koja je po meni mnogo važnija od same replike koja je uslijedila na tu diskusiju. Tražim da se moja diskusija unese u zapisnik koja je proizvela repliku.

**Begović Alija** – predsjedavajući Skupštine

Pošto se niko ne javlja za riječ zaključujem raspravu i konstatujem da na zapisnik sa 29-te sjednice Skupštine Bosansko-podrinjskog kantona Goražde nema primjedbi, te da je u skladu sa Poslovníkom Skupštine zapisnik usvojen.

**Borović Mensud** – Mi smo glasali za zapisnik sa 28-me sjednice Skupštine i potrebno je samo izvršiti dopunu sa mojom diskusijom. Znači, nema potrebe da se ponovo izjašnjavamo.

Kolegij Skupštine Bosansko-podrinjskog kantona Goražde, za današnju sjednicu Skupštine, predložio je slijedeći:

### D n e v n i r e d

1/ Vladin sat – poslanička pitanja i inicijative,

- 2/ Prijedlog Zakona o izmjenama i dopunama Zakona o komunalnim taksama Bosansko-podrinjskog kantona Goražde,
- 3/ Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde,
- 4/ Nacrt Zakona o vodama Bosansko-podrinjskog kantona Goražde,
- 5/ Nacrt Zakona o visokom obrazovanju Bosansko-podrinjskog kantona Goražde.

Kolegij Skupštine je izvršio dopunu dnevnog reda tako da 6-ta tačka treba da bude: Nacrt Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde.

- 7/ Prijedlog Odluke o davanju saglasnosti Premijeru Bosansko-podrinjskog kantona Goražde za zaključivanje Ugovora o kreditnom aranžmanu sa NLB Tuzlanskom bankom d.d. Tuzla,
- 8/ Prijedlog Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine,
- 9/ Izvještaj o radu Kantonalnog pravobranilaštva za 2008. godinu,
- 10/ Informacija o utrošku sredstava po Programu „Podsticaj za poljoprivredu“ za 2009. godinu za period od tri mjeseca /01. 06. – 01. 09. 2009. godine/,
- 11/ Informacija o preduzetim aktivnostima u vezi rješavanja problematike Mljekare “Milgor” d.o.o. Goražde,
- 12/ Informacija o stanju iz oblasti prometa i komunikacija na području Bosansko-podrinjskog kantona Goražde.

Tačka 13. bi bila: Izbor i imenovanja, a radi se o Prijedlogu Odluke o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde.

**Begović Alija** – predsjedavajući Skupštine

Otvaram raspravu po ponudjenom dnevnom redu.

**Obuća Bajro** - Ispred Kluba poslanika Stranke demokratske akcije predlažemo da se u tački 8. Izvještaj o radu Kantonalnog pravobranilaštva za 2008. godinu, riječ „Izvještaj“ zamijeni sa riječju „Informacija“ i bit će tačka 9.

### **O b r a z l o ž e n j e**

Pravobranilaštvo Bosansko-podrinjskog kantona Goražde je poseban samostalan organ po odredbama člana 1. i 2. Zakona o izmjenama i dopunama Zakona o Pravobranilaštvu Bosansko-podrinjskog kantona Goražde. Odredbe člana 40. Zakona o Pravobranilaštvu Bosansko-podrinjskog kantona Goražde kojim je regulisano da Pravobranilaštvo podnosi Izvještaj o radu nisu uskladjene sa odredbama člana 1. i 2. Zakona o izmjenama i dopunama Zakona o Pravobranilaštvu Bosansko-podrinjskog kantona Goražde i odredbama člana 65. Zakona o organizaciji organa uprave Federacije Bosne i Hercegovine. Bez obzira na ovo, a imajući u vidu činjenicu da je Pravobranilaštvo poseban samostalan organ proizilazi, da ovaj organ podnosi Informaciju o radu, a ne Izvještaj. Ovakvo obrazloženje možemo pronaći i u ovom dokumentu Pravobranilaštva Bosansko-podrinjskog kantona Goražde.

**Begović Alija** – predsjedavajući Skupštine

Da li još neko želi predložiti izmjene ili dopune dnevnog reda?

**Žuga Damir** – U Programu rada Skupštine u I tromjesečju je predviđen Izvještaj o radu Kantonalnog pravobranilaštva za 2008. godinu. Predlagač Vlada, obradivac Kantonalno pravobranilaštvo Bosansko-podrinjskog kantona Goražde. Mi nemamo primjedbi da ovo bude

Informacija, ali želim da kažem da u Programu rada Skupštine stoji Izvještaj, pa predlažem da se u narednom Programu rada Skupštine za 2010. godinu predloži kao Informacija.

**Begović Alija** – predsjedavajući Skupštine

Da li još neko želi riječ? Pošto se niko više ne javlja ostaje nam da se izjasnimo o prijedlogu g-dina Bajra Obuće da tačka 9. glasi: Informacija o radu Kantonalnog pravobranilaštva za 2008. godinu.

Ko je za, molim, da digne ruku? /24 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da smo, jednoglasno, sa 24 glasa „za“ prihvatili izmjenu i dopunu dnevnog reda, tako da tačka 9. glasi: Informacija o radu Kantonalnog pravobranilaštva za 2008. godinu.

**Turčalo Mehmed** – predložio je da se kroz izmjene i dopune Poslovnika Skupštine Bosansko-podrinjskog kantona Goražde jasno definiše šta je to Izvještaj, a šta Informacija.

Za današnju sjednicu predlažem slijedeći:

### **D n e v n i   r e d**

- 1/ Vladin sat – poslanička pitanja i inicijative,
- 2/ Prijedlog Zakona o izmjenama i dopunama Zakona o komunalnim taksama Bosansko-podrinjskog kantona Goražde,
- 3/ Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde,
- 4/ Nacrt Zakona o vodama Bosansko-podrinjskog kantona Goražde,
- 5/ Nacrt Zakona o visokom obrazovanju Bosansko-podrinjskog kantona Goražde.
- 6/ Nacrt Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde.
- 7/ Prijedlog Odluke o davanju saglasnosti Premijeru Bosansko-podrinjskog kantona Goražde za zaključivanje Ugovora o kreditnom aranžmanu sa NLB Tuzlanskom bankom d.d. Tuzla,
- 8/ Prijedlog Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine,
- 9/ Izvještaj o radu Kantonalnog pravobranilaštva za 2008. godinu,
- 10/ Informacija o utrošku sredstava po Programu „Podsticaj za poljoprivredu“ za 2009. godinu za period od tri mjeseca /01. 06. – 01. 09. 2009. godine/,
- 11/ Informacija o preduzetim aktivnostima u vezi rješavanja problematike Mljekare “Milgor” d.o.o. Goražde,
- 12/ Informacija o stanju iz oblasti prometa i komunikacija na području Bosansko-podrinjskog kantona Goražde.
- 13/ Prijedlog Odluke o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde.

Ko je za predloženi izmijenjeni dnevni red, molim, da digne ruku? /24 poslanika/

Ima li neko protiv? /Niko/

Da li se neko uzdržao od glasanja? /Niko/

### **Tačka 1.-**

Prelazimo na 1-vu tačku dnevnog reda: Vladin sat – poslanička pitanja i inicijative

**Tafro Hasan** – Ja imam jedno pitanje i jednu inicijativu.

Mi smo svjedoci da je u nedjelju nažalost preminula prva žrtva u Bosni i Hercegovini od svinjske gripe H1N1. Tu je i prije bilo alarmantnih podataka, međutim to bi zaista, trebalo da bude inicijalno sredstvo da se ova Država, Federacija, pa i Bosansko-podrinjski kanton zainteresuju još više i poduzmu odgovarajuće mjere da bi se ova pošast ovoga vijeka koja hara sigurno svijetom i ja nisam stručan po toj oblasti i neću to da obrazlažem, ali imam dovoljno informacija da vidim da nam se ne piše dobro, ali nadam se da će biti dobro, ali informacije govore tako. Zato ja postavljam prvo pitanje Vladi, nadležnom Ministarstvu, Zavodu za javno zdravstvo da odgovore šta poduzimaju i šta će poduzeti da se građani ovoga Kantona navikavaju na eventualne žrtve u Kantonu, nadam se ako Bog da da to neće da bude. Mislim da do sada, bar koliko sam ja vidio iz medija da u ovom Kantonu nema nekih edukativnih programa, nešto na Televiziji i radiju da bi se građani i narod ovoga Kantona usmjerili u tom pravcu da poduzima sve mjere da se spriječi, svaka žrtva je velika žrtva.

### *Inicijativa*

S obzirom da ovo vrijeme nije adekvatno vrijeme, nisu velike zime toliko bar znam i predlažem Vladi, odnosno nadležnom Ministarstvu obrazovanja da razmotri mogućnost i napravi pauzu od dvije sedmice, dvije hefte, ili dva tjedna pauze za sve škole srednje i osnovne, mislim da je to puno veća korist za zaštitu zdravlja, a da se to kako treba nadoknadi sa produžetkom u ljeto itd. Mislim da je to za bezbjednost, sad govorim kao predsjednik Komisije za bezbjednost ove Skupštine, bezbjednost građana je veoma važna, jer ja ne znam tačne podatke, zato bi to trebalo nadležno Ministarstvo i Zavod istražiti koliko učenika ne dolazi u škole? Evo ja sam praktično preležao gripu i još je nosim, nije hvala Bogu ona H1N1, doduše nema u Goraždu tog brzog testa pa i ne znam, ali je zaista po mom mišljenju, zato osjećam svoju obavezu da kažem ovo sve je veoma ozbiljno i upozoravajuće da ne trebamo sjediti skrštenih ruku, trebalo bi sve poduzeti da nema žrtava na ovom prostoru, a i na prostoru Federacije Bosne i Hercegovine i čitavog svijeta. Hvala!

**Imamović Demir** – ministar za socijalnu politiku, zdravstvo, raseljena lica i izbjeglice u Vladi Bosansko-podrinjskog kantona Goražde dao je usmeni odgovor na postavljeno poslaničko pitanje poslanika Tafro Hasana.

**Džemidžić Envera** – Na početku imam jednu inicijativu i imam jedno poslaničko pitanje, a prije nego krenem sa izlaganjem inicijative i ovog pitanja, želim ozbiljnu primjedbu da uložim na postavljanje mojih inicijativa, a vezane su za dva zakona. To je Zakon o predškolskom odgoju i Zakon o srednjoj školi. Ja sam dva puta reagovala, inicijative sam podnijela 11. juna 2009. godine, i rečeno mi je da će biti na tematskoj sjednici za obrazovanje, međutim ta tematska sjednica je pretvorena u redovnu sjednicu i nisu kandidovani zakoni. Neću sada lično da prozivam ljude koji su odgovorni za to, tražim da se na narednoj sjednici uvrste oba zakona. Hoće li biti po hitnom postupku neka se ministrica i Vlada odrede za to i radna tijela, ili da Skupština se odredi da li ćemo mi kao poslanici kršiti Program rada Skupštine. Zakon o predškolskom odgoju i obrazovanju planiran je u prvom tromjesečju, a Zakon o srednjoj školi u drugom tromjesečju, već su prošli rokovi, zakoni su spremni i mislim da nema razloga da se odgađa usvajanje ta dva zakona.

Na osnovu člana 202. i 203. Poslovnika Skupštine Bosansko-podrinjskog kantona Goražde, pokrećem slijedeću:

### *Poslaničku inicijativu*

Prema Ministarstvu za zdravstvo, socijalnu politiku i izbjegla i raseljena lica i prema Vladi Bosansko-podrinjskog kantona Goražde, da pronadju sredstva za specijalizaciju naših ljekara.

### *Obrazloženje*

Direktor Kantonalne bolnice gosp. Fadil Jahić je na Skupštini izvjestio da je naš Kanton dobio 5 specijalizacija, a da nedostaju sredstva. Mislim da smo mi na prošlom skupštinskom

zasjedanju donijeli Odluku o kupovini opreme za Kantonalnu bolnicu, znamo da je izražen problem specijalizacija, mislim da bi trebalo iznaći sredstva za to.

### *Poslaničko pitanje*

Moje poslaničko pitanje je vezano za jedan Zaključak sa skupštinskog zasjedanja, sa 24-te redovne sjednice Skupštine Bosansko-podrinjskog kantona Goražde, donesen je Zaključak koji je izglasan sa 23 glasa „za“, što znači nismo se dijelili po političkim opcijama, ja ga mogu radi podsjećanja i citirati:

„Obavezuje se Ministarstvo unutrašnjih poslova Bosansko-podrinjskog kantona Goražde da provede proceduru unapređenja policijskih službenika u Ministarstvu unutrašnjih poslova Bosansko-podrinjskog kantona Goražde u skladu sa Zakonom o policijskim službenicima i izvrše izmjene i dopune Pravilnika o unutrašnjoj organizaciji i sistematizaciji radnih mjesta i u njegove odredbe ugradi diplomirane kriminaliste, te da u toku 60 dana raspiše Konkurs za upražnjene pozicije“

Sinoć je bilo u medijima nekakvo objašnjenje, ali ja molim da na ovo pitanje odmah da odgovor premijer ili ministar.

**Sipović Nusret** – ministar za unutrašnje poslove u Vladi Bosansko-podrinjskog Goražde dao je usmeni odgovor na postavljeno poslaničko pitanje poslanice Envere Džemidžić. Poslanica je bila zadovoljna odgovorom na poslaničko pitanje.

**Terović Dževad** – Ja sam na 27-moj redovnoj sjednici Skupštine Bosansko-podrinjskog kantona Goražde, održanoj 24. avgusta 2009. godine pokrenuo jednu inicijativu koja se je odnosila na sačinjavanje jednog Izvještaja o izvršenim i ne izvršenim usvojenim poslaničkim inicijativama i zaključcima i stavovima Skupštine. Na slijedećoj 28-moj sjednici sam ponovo insistirao, obzirom da nisam dobio odgovor i da nije urađena ta analiza, odnosno Izvještaj ponovo sam zatražio na 29-toj sjednici da se to učini. Odgovoreno mi je od strane sekretara Skupštine Bosansko-podrinjskog kantona Goražde da je to Stručna služba uradila da je uputila prema Vladi da se Vlada očituje, a da Vlada to nije vratila Kolegiju kako bi ga razmotrio i eventualno uputio u skupštinsku proceduru. Ponovo na 29-toj sjednici sam insistirao i g-din predsjedavajući je zaključio ovo moje pitanje sa ovim obrazloženjem da traži i čeka kad Vlada uradi analizu i dostavi Kolegiju da će je on razmotriti i staviti u skupštinsku proceduru. Obzirom da do sad se to nije desilo, ja uporno insistiram i tražim da se ova analiza napravi, jer zaista ima puno značajnih poslovnih inicijativa, zaključaka i stavova koje je Skupština donijela i usvojila, a koje nisu realizovane i provedene.

Drugo, na prethodnoj sjednici Skupštine Bosansko-podrinjskog kantona Goražde ja sam postavio jedno poslaničko pitanje koje se odnosilo na kontrolu Zakona o javnim nabavkama, a posebno u njegovom dijelu koji se odnosi na primjenu i realizaciju već zaključenih ugovora po osnovu raspisanih tendera. Pitanje sam postavio Internom budžetskom revizoru i on se je očitovao svojim dopisom od 27. oktobra 2009. godine jednim uopštenim, bez ikakvih informacija i saglasnosti, ali je ostavio u posljednjem pasusu svog dopisa mogućnost, ukoliko ja insistiram da se uradi jedna Informacija vezano za realizaciju donešenih odluka iz dijela javnih nabavki, da će oni to uraditi uz pomoć Komisije za budžet, finansije i administrativna pitanja i dostaviti u formi Izvještaja Skupštini Bosansko-podrinjskog kantona Goražde, što ja prihvatam da se uradi, insistiram da se uradi i da ide u dalju skupštinsku proceduru. Jedino što ne prihvatam iz ovog dopisa je rečeno da ja kažem koga to treba kontrolisati. Mislim, da zaista nema smisla, ja nisam pojedinačno ni o kom govorio, govorio sam o problemu i da treba izvršiti kontrolu. Osnova za postavljanje mog pitanja je mišljenje Ureda za reviziju Federacije Bosne i Hercegovine, o kome smo mi raspravljali i u kvalifikaciji pod rednim brojem 1. kaže se: „Nisu se dosledno provodile odredbe Zakona o javnim nabavkama i Uputstva o primjeni Zakona o javnim nabavkama u dijelu provođenja procedura kod izbora najpovoljnijeg ponuđača za nabavku roba, vršenju usluga i ugovaranju radova koje je provela Vlada Bosansko-podrinjskog kantona Goražde.“ Dalje u svojoj analizi na tri mjesta ponovo Ured obrazlaže ovo pitanje pa kaže: „Postupak nabavke roba i usluga i radova potrebno je planirati po budžetskim korisnicima i

na nivou Kantona, utvrditi predmet nabavke, količinu, obim nabavke, vrijednost itd.“ I na kraju u konačnom dijelu koji se odnosi na same javne nabavke rečeno je da: „Postupak nabavke roba, usluga i radova sa utvrđenim predmetom nabavke, količinom, obimom nabavki i vrijednosti planiranih, predmet nabavki nije planiran po budžetskim korisnicima, niti na nivou Kantona, i u trećem dijelu govori kako nisu kod realizacije ugovora poštovane odredbe ugovora u dijelu i količina, vrste roba, rokova plaćanja itd. Znači ovdje nema ništa subjektivno, bilo je pitanje koje je istakao kao ozbiljan problem broj 1.u kontroli Ureda za reviziju u Federaciji Bosne i Hercegovine i ja g-dine predsjedavajući inisistiram da onaj na koga se pitanje odnosilo sačini jednu takvu Informaciju i da je dobiju poslanici kako bi mogli zauzeti stavove.

Poslanik zahtijeva da se Informacija dostavi u pisanoj formi.

**Agović Adis** – Na prethodnoj sjednici Skupštine sam postavio inicijativu u vezi izgradnje Spomen obilježja u Mjesnoj zajednici Posestra. Nije mi odgovoreno, pa u tom smislu molim sada ministra da mi usmeno to odgovori. Prvo, zašto mi nije do sada odgovoreno i drugo šta namjerava uraditi po tom pitanju? S druge strane pojavila se informacija u medijima vezano za radioaktivnost koja se pojavila na Haldištu, sa kakvim informacijama Ministarstvo za socijalnu politiku, zdravstvo, raseljena i izbjegla lica raspolaže i šta namjerava uraditi u tom smislu?

**Uruči Nazif** - premijer Bosansko-podrinjskog kantona Goražde dao je usmeni odgovor na postavljeno poslaničko pitanje poslanika Adisa Agovića.

**Bašić Redžo** - Na 27-moj redovnoj sjednici Skupštine Bosansko-podrinjskog kantona Goražde održanoj 24. avgusta 2009. godine, postavio sam pitanje sa kojom nepokretnom imovinom /zgrade i zemljišta/ raspolaže Bosansko-podrinjski kanton Goražde, ko se brine o održavanju nepokretne imovine i kada će ista biti upisana u zemljišne knjige? Dobio sam štur i nedovoljno precizan odgovor, a posebno što sam tražio kopiju popisnih lista nepokretne imovine i kopiju svih posjedovnih listova sa kojom Kanton raspolaže na taj dan, nisam dobio i na rošloj sjednici sam insistirao, međutim, evo do danas nemam odgovora na ovo pitanje. U skladu sa Poslovníkom Skupštine Bosansko-podrinjskog kantona Goražde bih tražio pismeni odgovor, a ako ne, onda stavljanje posebne tačke na dnevni red na neku od narednih sjednica.

Druga inicijativa na koju nisam dobio nikakav odgovor, a postavljena je na prethodnoj redovnoj sjednici, je bila da Vlada Bosansko-podrinjskog kantona Goražde pripremi i ako treba da ova Skupština u što kraćem roku donese Odluku o dodjeli dijela neperspektivne vojne imovine Javnom komunalnom preduzeću „6. Mart“, radi izmještanja građevinskih mašina i kamiona i da se na lokaciji pored upravne zgrade pomenutog preduzeća ponovo osposobi pijaca za prodaju poljoprivrednih proizvoda. Molio bih da se i ovo pitanje, pa ako je u proceduri barem da se obavijestim da je u proceduri, ako nešto zahtijeva obimniji odgovor, ili donošenje nekog propisa da se prosljedi obavještenje da li će biti i kada će to biti? Hvala!

**Adžem Dževad** – ministar za boračka pitanja u Vladi Bosansko-podrinjskog kantona Goražde dao je usmeni odgovor na inicijativu poslanika Agović Adisa.

**Žuga Damir** - intervencija

Ministar kaže da su sve Mjesne zajednice koje su prošle godine dobile finansijska sredstva za izgradnju Spomen obilježja u minusu 50%, nisu baš sva ministre, ja znam jednu Mjesnu zajednicu koja je striktno ispoštovala i zahvalila se na donaciji od 10.000 KM od strane Vašeg Ministarstva za izgradnju Spomen obilježja, u tom dijelu nisu svi prekoračili 50%, u tom dijelu intervencija. Želim dobronamjerno da kažem da bi najbolje bilo da ne trebate odvajati prioritete zapošljavanja i izgradnju Spomen obilježja, hair česmi, tog Projekta koji je bio prošle godine stao čini mi se ugradnja šehidskih mezarja, a da to trebate raditi preko Savjeta Mjesne zajednice, jer ipak oni znaju najbolje prioritete, to je jedan moj savjet Vašem Ministarstvu, a ako Vas konkretno ministre

interesuje koja Mjesna zajednica nije prekoračila ja ću Vam reći da Mjesna zajednica Osanica nije prekoračila, ugradila se u 10.000 KM, imamo idealno Spomen obilježje.

**Kurtović Mustafa** – ministar za privredu U Vladi Bosansko-podrinjskog kantona Goražde dao je usmeni odgovor na inicijativu poslanika Bašić Redža koje se odnosila na dodjelu dijela neperspektivne vojne imovine Javnom komunalnom preduzeću „6. Mart“, radi izmještanja građevinskih mašina i kamiona i da se na lokaciji pored upravne zgrade pomenutog preduzeća ponovo osposobi pijaca za prodaju poljoprivrednih proizvoda.

**Imamović Ibrahim** – Ja sam mislio da ovo ostavim kada bude na redu pravobranilaštvo. Ovdje govorimo nešto neperspektivna itd. Ovdje imamo tri poslanika koji su bili tada odbornici, kada je ovo dodjeljeno bivšem Ministarstvu odbrane itd. Ja ću vam pročitati ovu Odluku. Mi moramo da pazimo na imovinu, bez obzira da li je opštinska itd. Skupština Opštine je na sjednici Općinskog vijeća u prelaznom periodu 01.09.1997. godine donijela Odluku o prenošenju prava korištenja upravljanja objektima Vojnog logora opštinskog štaba teritorijalne odbrane Opštine na Ministarstvo odbrane Federacije Bosne i Hercegovine. Pravo korištenja. Pravo korištenja i upravljanja nad zgradama bivšeg logora označeno kao, pa su pobrojane čestice, prenosi se bez naknade na Ministarstvo odbrane. Pravo korištenja. Nije vlasništvo preneseno, ovo je opštinsko i sada mi naše što je opštinsko, nešto se dogovaramo, čekamo Vladu itd. Ovo pravnicima trebaju da kažu. Dok je postojalo Ministarstvo odbrane Federacije preneseno mu je pravo korištenja. Gašenjem toga ovo pravo je prestalo Ministarstvu, a vlasnik je Opština i vlasnik svega ovoga je Opština i ona treba u skladu sa svojim programima i planovima da učestvuje. Mi zaboravljamo neke stvari, ja sam našao ovu Odluku, iskopirao sam je i ovdje jasno stoji, ne može sad uslovljavati neko ko ne postoji, ni Vlada Federacije kako je ovlaštena da uslovljava šta ćemo mi to raditi i šta će Opština raditi. Opština će raditi sa svojom zemljom. To se nadovezuje na pitanje Redžovo, i da vidimo jedan put konačno šta je to imovina kantona, šta je imovina Opštine, i na koji način da govorimo. Ovo je vrlo značajna stvar, ne može ni Vlada, ni niko, ni da se čeka, što se vraća. Čim je ukinuto Ministarstvo odbrane je to automatski postalo na ovome, jer taj kome je dato pravo korištenja prestao je da postoji i treba da vrati. To trebaju naši pravnicima da urade, jer kaže se prenosi se pravo korištenja i upravljanja. Taj subjekat je prestao da postoji i vraća se Opštini, jer nema toga ko će upravljati. Sad se kaže neko uslovljava, čeka se, nema se šta čekati, to je pravno. Ovo pravnicima neka uzmu i neka zaštite imovinu Opštine.

**Žuga Damir** – Ja imam dvije poslaničke inicijative

Na osnovu člana 95., 202. i 203. Poslovnika Skupštine Bosansko-podrinjskog kantona Goražde, pokrećem slijedeću:

### ***Poslaničku inicijativu***

Da se svi Zaključci koje Skupština Bosansko-podrinjskog kantona Goražde donese ili usvoji, objavljuju u „Službenim novinama Bosansko-podrinjskog kantona Goražde“.

### ***Obrazloženje***

Zaključci Skupštine Bosansko-podrinjskog kantona Goražde bi trebali da se objavljuju u „Službenim novinama Bosansko-podrinjskog kantona Goražde“, radi lakšeg i boljeg praćenja rada kako izvršne vlasti tako i lakšeg rada zakonodavne vlasti. Smatram da bi objavljivanje zaključaka u „Službenim novinama“, a to je praksa rada državnog i federalnog Parlamenta, kao i praksa ostalih kantona u Federaciji bosne i Hercegovine, pa čak i nekih općina koje imaju svoj „Službeni list“, u mnogo čemu popravilo i dodatno uozbiljilo rad ovog Parlamenta.

Dodatno rasterećenje „Službenih novina Bosansko-podrinjskog kantona Goražde“ je bilo nedavno kada je Općina Goražde počela sa objavom cjelokupnog svoga rada u svom „Službenom listu“, što daje prostor za objavu donešenih zaključaka ovog Parlamenta u „Službenim novinama Bosansko-podrinjskog kantona Goražde“.

## *Druga poslanička inicijativa*

Da Vlada Bosansko-podrinjskog kantona Goražde u Budžetu za 2010. godinu obavezno planira i obezbijedi finansijska sredstva u iznosu od 100.000,00 KM za potpuno stavljanje u funkciju Zavoda za javno zdravstvo, tj. tražim da Vlada obezbijedi finansijska sredstva za realizaciju projekta: „Stavljanje u funkciju laboratorija za potrebe sanitarne mikrobiologije i sanitarne hemije.

### *Obrazloženje*

Na području Bosansko-podrinjskog kantona Goražde ne postoji javno zdravstvene laboratorije za kontrolu higijenske ispravnosti životnih namirnica, tako da stanovništvo Kantona konzumira higijenski nesigurne životne namirnice. Ovim projektom predlaže se osnivanje i opremanje laboratorije za vršenje analiza životnih namirnica, pri Zavodu za javno zdravstvo Bosansko-podrinjskog kantona Goražde. Za stavljanje laboratorije u funkciju neophodno je izvršiti rekonstrukciju i adaptaciju postojećih prostorija i nabavku nedostajuće opreme.

Laboratorij bi se bavio vršenjem osnovnih mikrobioloških i hemijskih analiza životnih namirnica. Stavljanjem u funkciju i radom javno zdravstvenog laboratorija, stekli bi se uslovi za kvalitetniji nadzor nad higijenskom ispravnosću životnih namirnica i predmeta opšte upotrebe, samim tim bi se obezbijedile higijenski ispravne životne namirnice za stanovništvo Kantona. Ovaj projekat ima ne samo kantonalni, nego i regionalni značaj, obzirom da bi njegovom realizacijom profunkcionisala jedina kvalitetna javno zdravstvena laboratorija u ovom dijelu Bosne i Hercegovine.

**Bašić Redžo** – Na osnovu člana 95. stav 1. tačka a. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, pokrećem slijedeću:

### *Inicijativu*

Da nadležno Ministarstvo i Vlada Kantona pokrenu proceduru kod Vlade Federacije Bosne i Hercegovine da se put koji ide desnom obalom rijeke Drine: Cvilin /entitetska granica/ - Kožetin – Osanica – Sadba – Ahmovići – Zupčići /veza na R 448/ proglasi regionalnim putem.

### *Obrazloženje*

U cilju kvalitetnog povezivanja pomenutih naselja, međusobne integracije cjelokupnog prostora Kantona i zadržavanja stanovništva na ovim prostorima kao i činjenice da ovaj putni pravac povezuje 4 općine/opštine iz oba entiteta: Foča /RS/ - Foča/Ustikolina /FBiH/ - Goražde /FBiH/ i Novo Goražde /RS/, smatram da ovu inicijativu treba što prije realizovati.

## *Druga inicijativa*

Da Vlada Kantona izvrši izmještanje – vraćanje ureda za izdavanje ličnih dokumenata u prizemlje zgrade Ministarstva unutrašnjih poslova Bosansko-podrinjskog kantona Goražde.

### *Obrazloženje*

U cilju racionalizacije i smanjenja izdataka – troškova za zakupnine prostora, kao i da građani nepotrebno hodaju od vrata do vrata kako bi samo stavili pečat na pojedine dokumente koji se izdaju u pomenutom uredu, smatram da ovu inicijativu treba što prije realizovati. Radi posjećanja već su 4 ili 5 Kantona izvršili racionalizaciju i iz tih pošta vratili urede u Vladine zgrade.

**Terović Dževad** – Ja sam za danas pripremio dva poslanička pitanja.

Prvo se odnosi na isplaćivanje prekovremenog rada, što je i konstatovao i Ured za reviziju svojim komačnim Izvještajem od 14.09.2009. godine. Citiraću šta je napisano: „Obzirom da je

uočeno da je prekovremeni rad isplaćivan u koninuitetu tokom cjele godine pojedinim uposlenicima u organima uprave, postavlja se pitanje opravdanosti uvođenja istog, obzirom da je Zakon o radu regulisao prijem uposlenika na određeno vrijeme“. Obzirom da na evidenciji Zavoda za zapošljavanje Bosansko-podrinjskog kantona Goražde ima preko 4000 evidentiranih neuposlenih radnika, cijenim da bi bilo daleko racionalnije, korisnije i opravdanije angažovati ljude koji su tamo na Zavodu, nego onim koji već imaju posao da rade prekovremeno i da imaju dodatne naknade. Tražim u pismenoj formi koje nadležan, je li Ministarstvo finansija ili neko drugi da dobijem odgovor, koji su to uposlenici, za koje poslove i radne zadatke se angažuju prekovremeno i primaju dodatne naknade?

### *Drugo poslaničko pitanje*

Prema informacijama kojim raspolazem značajan broj uposlenika u Osnovnom obrazovanju pokrenuo je tužbe protiv Vlade Bosansko-podrinjskog kantona Goražde ili Bosansko-podrinjskog kantona Goražde za kršenje Kolektivnog ugovora. Ove informacije koje su neslužbene i nezvanične govore da se radi ipak o značajnom broju uposlenika i značajnim sredstvima koja bi imala za posljedicu u narednim fiskalnim godinama opterećenje budžetskih rashoda. Zamolio bih Kantonalno pravobranilaštvo, ili one kojim je poznat taj problem, a u cilju preventivnog djelovanja i eventualno postizanje dogovora sa uposlenicima i sprječavanje neplaniranih rashoda u narednim fiskalnim godinama, da prikupimo jednu informaciju da vidimo koliko je to, je li to zaista ozbiljno, i da li za posljedicu možemo imati u narednom periodu značajno izdvajanje sredstava iz ovakog skromnog budžeta.

**Obuća Bajro** – U skladu sa odredbama Poslovnika Skupštine Bosansko-podrinjskog kantona Goražde postavljam dva poslanička pitanja.

Prvo je pitanje već postavljeno, istina ne formalno pravno u okviru tačke dnevnog reda koja se zove Vladin sat – poslanička pitanja i inicijative i naravno, nisam dobio odgovor, zato ga i ponavljam na današnjoj sjednici u okviru tačke Vladin sat – poslanička pitanja i inicijative. Pitanje glasi: Koliko su uposlenici u obrazovanju na području Bosansko-podrinjskog kantona Goražde primili finansijskih sredstava po osnovu plaće i svih drugih naknada koje nemaju karakter plaće iz Budžeta Bosansko-podrinjskog kantona Goražde za mjesec decembar 2008. godine? Molim da mi se odgovor dostavi u preglednoj formi tj. tabelarno. Samo još nešto želim da kažem, ukoliko postoje neke zakonske smetnje da se ovaj odgovor dostavi sa imenom i prezimenom uposlenika, predlažem da se odgovor dostavi sa inicijalima, ili čak pod šifrom, jer apsolutno mi nije bitno ime i prezime vezano za ovaj odgovor koji tražim, da se ne bi otkrio identitet osobe, odnosno uposlenika, ako je problem neki zakonski propis. Iako s druge strane ja smatram da su to osobe koje rade u javnim ustanovama i vrlo je pohvalno da se zna, vidjeli ste kroz one izvještaje Centra civilnih inicijativa da se tačno zna u fening kolko koji poslanik i kolko koji ministar dobije finansijskih sredstava po svim osnovama, ja tu ne vidim probleme da se zna u svim oblastima, posebno oni koji rade u državnoj upravi, koji primaju sredstva iz Budžeta Kantona itd., da se to kaže imenom i prezimenom, ali ponovo se ograđujem ako postoji neki zakonski osnov i neka zakonska smetnja da se otkrije identitet, nikakav problem imaju šifre da se to dostavi, pregledno tabelarno po školama za sve uposlenike, za svo osoblje. Zna se šta je obrazovanje, ne samo za one koji izvode nastavu, nego za sve uposlenike.

### *Drugo poslaničko pitanje*

Koliki su prihodi Budžeta Bosansko-podrinjskog kantona Goražde za 2008. godinu i prvih 9 mjeseci 2009. godine po osnovu turizma tj. turističke djelatnosti?

**Ferhatović Jasmin** – Pošto su danas svi ministri prisutni, ja ću tražiti usmeni odgovor, pitanja su kratka, a govoriću kao predsjedavajući Komisije rad, zdravstvenu i socijalnu zaštitu. Prema dojavama građana iz Mjesne zajednice Berič dobio sam informaciju da Ambulanta radi od 15:00 sati dva dana u hefti i pošto smo svi svjedoci da tamo živi stanovništvo od prosjeka 65 godina i gore, pitam ministra da li može zajedno sa Domom zdravlja Goražde pomjeriti ovo radno vrijeme, jer kazao sam

starosnu dob, a pošto dolazi zima mislim da sva ta sela koja gravitiraju sa tom Mjesnom zajednicom, najbrži, najzdraviji može stići za sat vremena.

### *Drugo poslaničko pitanje*

Zašto stanovnici, odnosno starice iz Mjesne zajednice Bogušići zbog zdravstvenog stanja, koji su smješteni u Goraždu kod najbliže rodbine, zbog njege samih tih staraca ne mogu prenijeti zdravstveni karton iz te ambulante u bilo koju drugu ambulantu koja gravitira stanu gdje su ti starci smješteni.

Pitanje upućeno Ministru privrede – Da li su po nalazu Komisije Ministarstva za privredu uočeni nedostaci na asfaltnoj podlozi na putu prema Prači u potpunosti otklonjeni?

### *Inicijativa*

Putujući ovim putem od Prače do Goražda koji je uslovan za 15-16 vijek, evo već 15 godina, svjedok sam jutros da na tom putnom pravcu, a iznad grada Goražda formira se jedna ogromna deponija smeća. Ja pozivam Vladu, Općinu Goražde, inspekcije da na udaljenosti od grada Goražda prema Prači na oko 5 km formirana deponija smeća, koja sad u ovo vrijeme pogotovu zaudara, da čak izutra u 6:00 sati osjetite smrad koji ulazi u autobus kojim putuju naša djeca na školovanje i rad u Goražde.

**Imamović Demir** – ministar za socijalnu politiku, zdravstvo, raseljena lica i izbjeglice u Vladi Bosansko-podrinjskog kantona Goražde dao je odgovor na postavljena poslanička pitanje poslanika Ferhatović Jasmina. Poslanik je bio zadovoljan odgovorom.

**Kurtović Mustafa** – ministar za privredu u Vladi Bosansko-podrinjskog kantona Goražde dao je usmeni odgovor na postavljeno poslaničko pitanje poslanika Ferhatović Jasmina. Poslanik je bio zadovoljan odgovorom.

**Turčalo Mehmed** – Ja ću postaviti dva poslanička pitanja.

Shodno članu Poslovnika Skupštine Bosansko-podrinjskog kantona Goražde, pitanje za premijera i ministra finansija. Ovo što gledamo ovih dana na Televiziji Goražde pregovori i potpisivanje nekih sporazuma sa sindikatima budžetskih korisnika i vraćanje osnovice na 360 KM, da li to znači da je tzv. Interventni Zakon, kasnije nazvan Zakon o načinu ostvarivanja ušteta u Bosansko-podrinjskom kantonu Goražde, objavljen u „Službenim novinama Bosansko-podrinjskog kantona Goražde“, broj:9/09 stavljen van snage kako bi svi budžetski korisnici ako ništa znali kolika im je osnovica plaće, što tokom cijele ove godine nikad nije bilo definisano. Ako je stavljen van snage Vlada potpomognuta skupštinskom većinom je mimo volje poslanika Stranke za Bosnu i Hercegovinu, i svih onih koji su se prema ovom Zakonu odnosili sa zebnjom i strahom, da stvar bude još gora jedini smo Kanton koji je na ovaj način počeo primjenjivati mjere štednje, a ako je to tako mi iz Stranke za Bosnu i Hercegovinu smo ponosni na to što takav Zakon nismo mogli izglasati i što ste nam se i vi iz Koalicije nakon pretrpjelog straha i duševne boli pridružili nakon dva i po mjeseca i shvatili da ste bili na pogrešnom putu rješavanja krize i izlaska iz recesije. Ako je u pitanju nešto drugo što se zove nepoštivanje Zakona o radu i Kolektivnog ugovora, potpisanom između Vlade i Sindikata, onda to nije dobro, šta to znači, svi korisnici budžeta mogu sami da kažu nemam namjeru biti u ulozi sindikaliste, ali kao čovjek uposlenik u osnovnom obrazovanju smatram da je ovo krajnje cinično i nekorektno držati tolike budžetske korisnike da budu mirni i da naredne dvije godine ništa ne smiju tražiti, inače bi se im mogla smanjiti plaća za 10%.

### *Drugo poslaničko pitanje*

Zašto kasni objavljivanje Konkursa za dodjelu kredita studentima dodiplomskog studija za studijsku 2009/2010 godinu, ako je moguće da mi ministrica za obrazovanje, nauku, kulturu

i sport odgovori koji je to krajnji datum objavljivanja ovoga Konkursa i hoće li se nešto mjenjati iz postojeće Odluke o utvrđivanju utvrđenim kriterijima. Znamo da je ovaj Konkurs prošle godine bio objavljen već 10. oktobra, a danas je 17. novembar, što znači da se sa objavljivanjem do današnjeg dana kasni samo 48 dana.

Ovdje jedno malo potpitanje, da ne kažemo da je treće, odnosi se na obrazovanje, upućujem ga ministru za boračka pitanja. Tražim da mi dostavi spisak učenika srednjih škola koji su ostvarili pravo na besplatne udžbenike, kao i uporedne pokazatelje u odnosu na prošlu školsku godinu, broj učenika i visinu iznosa sredstava po osnovu ovoga prava. Volio bih da mi se odgovori usmeno danas ako je to moguće.

**Nazif Uruči** – premijer Bosansko-podrinjskog kantona Goražde dao je usmeni odgovor na prvo postavljeno poslaničko pitanje poslanika Turčalo Mehmeda.

**Delizaimović Alma** – ministrica za obrazovanje, nauku, kulturu i sport u Vladi Bosansko-podrinjskog kantona Goražde dala je usmeni odgovor na drugo postavljeno poslaničko pitanje poslanika Turčalo Mehmeda. Poslanik je bio djelimično zadovoljan odgovorom i traži da mu se u pisanoj formi dostave odgovori na postavljena poslanička pitanja.

**Borović Mensud** - Na osnovu člana 202. i 203. Poslovnika Skupštine Bosansko-podrinjskog kantona Goražde, podnosim:

#### ***1/Poslaničko pitanje***

Da li Bosansko-podrinjski kanton učestvuje u sufinansiranju troškova smještaja studenata sa područja Bosansko-podrinjskog kantona Goražde u Studentskim domovima u Sarajevu i da li svoje obaveze po tom osnovu izmiruje redovno, ili je ovo pitanje riješeno na drugi način u interesu studenata sa područja Bosansko-podrinjskog kantona Goražde?

#### ***2/Poslanička inicijativa***

Da u cilju obezbjedjenja kvalitetnije zdravstvene zaštite građana Bosansko-podrinjskog kantona Goražde, nadležni organi putem sredstava informisanja, ili na drugi prikladan način redovno informišu građane o ispravnosti vode za piće koja se koristi iz javnih vodosistema na području sve tri općine Bosansko-podrinjskog kantona Goražde.

**Delizaimović Alma** – ministrica za obrazovanje, nauku, kulturu i sport u Vladi Bosansko-podrinjskog kantona Goražde dala je usmeni odgovor na prvo postavljeno poslaničko pitanje poslanika Borović Mensuda. Poslanik je bio zadovoljan odgovorom.

**Adžem Memsur** – Ja sam želio isto tako danas da progovorim nešto vezano za ambulantu u Beriču, međutim nema tu ministra, ali ći imati priliku u toku dana sa njim razgovarati i upoznati ga sa onim šta su najveći problemi ove ambulante.

Na osnovu člana 95., 202. i 203. Poslovnika Skupštine Bosansko-podrinjskog kantona Goražde, pokrećem slijedeću:

#### ***Poslaničku inicijativu***

Da sve partije koje participiraju u Skupštini Bosansko-podrinjskog kantona Goražde dobijaju redovno po jedan primjerak „Službenih novina Federacije Bosne i Hercegovine“, radi boljeg i kvalitetnijeg rada ovog Parlamenta i adekvatnijeg praćenja višeg Parlamenta, tj. Parlamenta Federacije Bosne i Hercegovine.

S obzirom na to da se ovih dana privode kraju radovi na asfaltiranju i rekonstrukciji sportskog igrališta u Beriču iskoristiću ovu priliku da se svim uvažanim kolegama i kolegicama još jednom zahvalim na tome što su imali sluha i podržali ovaj moj Amandman. Želim ovom prilikom isto tako da firmi „Putevi“ d.d. Goražde u ime građana, oni su nešto vrlo malo uradili prilikom dolaska u Berič, počistili su neke naslage koje su se nalazile na kolovozu, pročistili nekoliko propusta, to su građani primjetili i zamolili me da u svoje i njihovo ime još jednom kažem hvala!

Agović Adis - Na osnovu člana 202. i 203. Poslovnika Skupštine Bosansko-podrinjskog kantona Goražde, pokrećem slijedeću:

### *Inicijativu*

Da Ministarstvo za urbanizam, prostorno uređenje i zaštitu okoline za narednu sjednicu Skupštine Bosansko-podrinjskog kantona Goražde pripremi Izvještaj o realizaciji skupštinskih zaključaka koji se odnose na stambenu problematiku tj. potkrovne stanove, te da se na istu pozove pomoćnik načelnika za urbanizam Općine Goražde gosp. Adžem Enver ukoliko je to potrebno.

Kumro Mesud – Obzirom na ozbiljnost ove najnovije gripe H1N1 i na probleme koje je ta gripa prouzrokovala u susjednim državama i ozbiljnošću sa kojom su pristupile vlasti u susjednim državama, mislim da bi bilo vrlo korisno i efikasno da u nekoj od naših zdravstvenih ustanova, da li bi to bila Bolnica ili Zavod za javno zdravstvo bude otvorena jedna telefonska info linija koja bi bila u funkciji svih 24 sata i na taj način naši građani bi mogli putem telefona da dođu do informacija o toj gripi i tako bi smo postigli višestruke koristi. Ti naši građani ne bi morali da idu u zdravstvenu ustanovu ako bi posumnjali da su dobili tu gripu i na taj način oni bi spriječili dalje širenje te gripe. Ja toliko, samo da dam doprinos tim inicijativama.

– Postavljam slijedeće:

### *Poslaničko pitanje*

Kada će demobilisani borci sa područja Bosansko-podrinjskog kantona Goražde početi redovno primati novčane nadoknade od 150,00 KM.

### *Obrazloženje*

Obzirom da su demobilisani borci našeg Kantona primili poslednju nadoknadu za mjesec juni, mislim da je krajnje nekorektno prema ovim ljudima da se dovode u ovako tešku situaciju, obzirom da je ovih 150,00 KM jedini izvor primanja za njih i njihove familije.

Na osnovu člana 95., 202. i 203. Poslovnika Skupštine Bosansko-podrinjskog kantona Goražde, pokrećem slijedeću:

### *Poslaničku inicijativu*

Da članovi Vlade organizuju press konferenciju i istupaju na sredstvima informisanja samo u slučajevima donošenja kvalitetnih i konkretnih odluka kojima će se poboljšati standard i kvalitet života građana Bosansko-podrinjskog kantona Goražde.

### *Obrazloženje*

Posljednjih dana putem TV Goražda imali smo priliku da svako veče propratimo press konferenciju nekog od naših uvažanih ministara. Uvjeren sam da su ovom prilikom iznevjerena očekivanja javnosti da se iznesu vizije rješavanja najvećeg broja problema sa kojima se suočavaju građani Bosansko-podrinjskog kantona Goražde.

Zbog toga bi predložio premijeru i ostalim članovima Vlade Bosansko-podrinjskog kantona Goražde da koriste medije u slučajevima kada urade nešto konkretno na rješavanju problema nezaposlenosti, kada izrade strateška dokumenta koja se odnose na razvoj, borbu protiv kriminala i korupcije, kada se usvoje propisi kojima će se procedura registrovanja i pokretanja biznisa pojednostaviti i time otvoriti povoljnija pozicija za domaće i strane ulagače.

Javnost od Vlade očekuje da u svom radu pokaže više socijalne osjetljivosti i racionalnosti u trošenju budžetskih sredstava, da se konačno nešto učini kako bi ovaj Kanton dobio jasnu i izvjesnu politiku načina finansiranja i da Vlada konačno otpočne sa realizacijom svog Programa mjera za ublažavanje posljedica ekonomske krize, koja je izražena početkom ove godine, tako da je većina rokova poodavno istekla.

**Adžem Dževad** – ministar za boračka pitanja u Vladi Bosansko-podrinjskog kantona Goražde odgovorio je usmeno na prvo postavljeno poslaničko pitanje poslanika Kumro Mesuda.

Poslanik Kumro Mesud nije bio zadovoljan odgovorom ministra za boračka pitanja. Dalje u diskusiji su učestvovali: Ferhatović Jasmin i premijer Bosansko-podrinjskog kantona Goražde Uruči Nazif.

**Begović Alija** – Pokrećem dvije poslaničke inicijative

Prvu inicijativu upućujem medijima Bosansko-podrinjskog kantona Goražde sa željom da ih na neki način animiram da daju što više edukativnih sadržaja u vezi sa prevencijom i ponašanjem građana, a u vezi sa gripom izazvanom virusom H1N1. Mislim da je što više moguće takvih emisija unijelo svjetlo i objasnilo građanima u kojim situacijama i kako da se ponašaju, u prvi mah mi se svidjela i inicijativa g-dina Kumra u vezi sa info telefonom. Ukoliko bi građani bili dovoljno informisani u kojim slučajevima treba ići doktoru, koje su to temperature, koje je to trajanje bolesti, klinička slika, koji su to simptomi koji se mogu smatrati komplikacijama i koji zavređuju liječničku intervenciju. U tom slučaju evo primjera radi, možda čak imam informacije da u Hitnu pomoć u Kamntonolnu bolnicu Goražde dolaze pacijenti kasno po noći sa djecom koja imaju običnu nahladu. Zapravo je veća greška doći sa djetetom koje ima nahladu u neku sredinu gdje eventualno, postoji već u aerosolu u zraku, zbog toga što je tu već bio neko koje obolio od gripe, mada kažem kod nas u Kantonu incidenta gripe još nije verificirana, nemamo takvih slučajeva, ali je mislim, prevencija u svakom slučaju najbolji lijek borbe protiv virusa. Ja sam zdravstveni radnik i pratim medije, međutim nemamo dovoljno takvih informacija, a mogu da kažem kako tek onda obični građani koji nemaju medicinsko obrazovanje.

### ***Druga inicijativa***

Prema ministru zdravstva, takođe se odnosi na prevenciju gripa izazvanim virusom H1N1, da se posebna pažnja obrati školama. Čujem da se provodi dezinfekcija, međutim, znamo kako se virus prenosi aerosolom, kapična infekcija i najviše direktnim kontaktom, prenosom preko ruku na kojima su virusi usled kihanja, kašljanja i dodira sa tjelesnim tečnostima. Mislim, da bi u tom smislu bilo dobro obezbijediti na neki način dezinfekciju ruku djece u školama. Kao preventivno da se u aerosol u tečnost sa dezinfekcionim sredstvima za koje se stručnjaci trebaju opredjeliti koja hlorna sredstva koja mogu dezaktivirati takve viruse, u tom smislu, najvažnije je raditi preventivno, a već kad se pojavi virus onda ova mjera što g-din Hasan Tafro kaže moraju se obustavljati nastave itd. Hvala!

Hitna služba ima broj 124, pa se informacije i savjeti mogu na tom broju dobiti u određenim slučajevima.

**Mulahmetović Mirsad** - Očito da je već predizborna kampanja počela i mi vidimo da nije više Vladin sat, nego je on i dva sata, a možda i više da traje kako bude se primicala predizborna godina. Iako je već bilo prijedloga da se ovaj Vladin sat sa prve tačke dnevnog reda pomjeri na zadnju tačku, pokrećem inicijativu da Kolegij pri izradi prijedloga dnevnog reda pod hitno ovu tačku Vladin sat – poslanička pitanja i inicijative stavi na zadnju tačku dnevnog reda, tako da sve dok se ne dođe do

promjene, dogovora i izmjene Poslovnika da stoji Vladin sat – ili više sati, da tako stoji u dnevnom redu.

**Begović Alija** – predsjedavajući Skupštine

Zaključujem ovu tačku uz insistiranje da poslanici koji su postavili poslanička pitanja dostave ih u pisanoj formi Stručnoj Službi Skupštine Bosansko-podrinjskog kantona Goražde, kako bi najadekvatnije mogli ih proslijediti Vladi i obezbijediti odgovore na ta pitanja, takođe pozivam sve one na koje se odnose naša pitanja da poštuju Poslovnik, da budu ažurni i da dostave kvalitetne, sadržajne i blagovremene odgovore na naša postavljena pitanja.

## **Tačka 2.-**

Otvaram raspravu po 2-goj tački dnevnog reda: Prijedlog Zakona o izmjenama i dopunama Zakona o komunalnim taksama Bosansko-podrinjskog kantona Goražde.

Obrazloženje po ovoj tački dnevnog reda podnio je predlagač Prijedloga Zakona Žuga Damir, a u diskusiji su učestvovali: Agović Adis, Žuga Damir, Borović Mensud, Kumro Mesud, Podrug Salko i Begović Alija i Halilović Adis.

/Sjednici prisustvuje 21 poslanik/

**Halilović Adis** – Predlažem da se danas ne izjašnjavamo o Prijedlogu ovog Zakona već da za narednu sjednicu Skupštine dobijemo mišljenje Vlade i skupštinskih radnih tijela i da se o istom očitujemo na narednoj sjednici Skupštine.

**Begović Alija** – predsjedavajući Skupštine

Pošto se niko više ne javlja za riječ, zaključujem raspravu po Prijedlogu Zakona o izmjenama i dopunama Zakona o komunalnim taksama Bosansko-podrinjskog kantona Goražde i pozivam poslanike da se izjasnimo o prijedlogu poslanika g-dina Adisa Halilovića da se o ovom Zakonu izjasnimo na narednoj sjednici Skupštine kada dobijemo mišljenje Vlade i skupštinskih radnih tijela.

Ko je za, molim, da digne ruku? /9 poslanika/

Ima li neko protiv? /7 poslanika/

Da li se neko uzdržao od glasanja? /5 poslanika/

Konstatiram da sa 9 glasova „za“, 7 „protiv“ i 5 „uzdržanih“ glasova prijedlog g-dina Adisa Halilovića nije dobio potrebnu većinu.

Pozivam poslanike da se izjasnimo o Prijedlogu Zakona o izmjenama i dopunama Zakona o komunalnim taksama Bosansko-podrinjskog kantona Goražde.

Ko je za, molim, da digne ruku? /10 poslanika/

Ima li neko protiv? /Niko/

Da li se neko uzdržao od glasanja? /11 poslanika/

**Žuga Damir** – U ime Kluba poslanika Stranke za Bosnu i Hercegovinu izražavam sumnju u glasanje i tražim da se izjasnimo pojedinačno.

**Begović Alija** – predsjedavajući Skupštine

Nakon pojedinačnog glasanja konstatiram da je „za“ Prijedlog Zakona o izmjenama i dopunama Zakona o komunalnim taksama Bosansko-podrinjskog kantona Goražde glasalo 9 poslanika, „protiv“ niko i 12 „uzdržanih glasova.

Konstatiram da sa 9 glasova „za“ i 12 „uzdržanih“ glasova Skupština Bosansko-podrinjskog kantona Goražde nije prihvatila Prijedlog Zakona o izmjenama i dopunama Zakona o komunalnim taksama Bosansko-podrinjskog kantona Goražde.

### **Tačka 3.-**

Prelazimo na 3-ću tačku dnevnog reda: Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde.

/Sjednici prisustvuje predsjednik Udruženje poljoprivrednika Bosansko-podrinjskog kantona Goražde Avdo Muslimović/.

Uvodno obrazloženje po Prijedlogu Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde dao je ministar za privredu u Vladi Bosansko-podrinjskog kantona Goražde g-din Mustafa Kurtović, a u diskusiji je učestvovao Obuća Bajro.

**Borović Mensud** - Na osnovu člana 140. i 141. Poslovnika Skupštine Bosansko-podrinjskog kantona Goražde na Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde, podnosim slijedeći:

### **A m a n d m a n**

U članu 7. Prijedloga Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde, iza posljednje alineje upisati novu alineju koja glasi: „postojeći uređeni voćnjaci“. Na javnim raspravama je podržan ovaj prijedlog da i ovaj segment bude obuhvaćen podsticajima, pa bih zamolio bih predlagača da prihvati ovaj Amandman i da bude sastavni dio prijedloga Zakona.

**Turčalo Mehmed** – Klub poslanika Stranke za Bosnu i Hercegovinu na Prijedloga Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde, na osnovu članova 140., 141. i 142. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, podnosi slijedeći:

### **A m a n d m a n**

U članu 13. Prijedloga Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde predlažemo da stoji:

„Sredstva za novčani podsticaj iz člana 1. ovog Zakona, osiguravaju se u Budžetu Bosansko-podrinjskog kantona Goražde /u daljem tekstu: Budžet Kantona/ i ista će se planirati za svaku kalendarsku godinu Budžeta Bosansko-podrinjskog kantona Goražde s ciljem da izdvajanja po ovom osnovu ne mogu biti manja od 4% godišnjeg Budžeta Kantona.

Dalje, u diskusiji po Prijedlogu Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde učestvovali su: Imamović Ibrahim i Turčalo Mehmed.

**Begović Alija** – predsjedavajući Skupštine

Sjednici prisustvuje g-din Avdo Muslimović predsjednik Udruženja poljoprivrednika Bosansko-podrinjskog kantona Goražde i traži da nam se obrati. Hoćemo li dopustiti g-dinu Muslimoviću da se obrati?

Skupština je, jednoglasno, odobrila obraćanje Muslimović Avdu predsjedniku Udruženja poljoprivrednika Bosansko-podrinjskog kantona Goražde.

Muslimović Avdo predsjednik Udruženja poljoprivrednika Bosansko-podrinjskog kantona Goražde obratio se Skupštini.

**Begović Alija** – predsjedavajući Skupštine

Pošto se niko više ne javlja za riječ, zaključujem raspravu i predlažem da damo pauzu do 14 sati kako bi se Vlada Bosansko-podrinjskog kantona Goražde očitovala o predloženim amandmanima na Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde.

/Završena pauza/

/Na traženje predsjednika Kluba poslanika Stranke za Bosnu i Hercegovinu izvršena je prozivka poslanika/

**Begović Alija** – predsjedavajući Skupštine

Konstatujem da od ukupno 25 sjednici prisustvuje 23 poslanika /Odsutni poslanici Socijaldemokratske partije Bosne i Hercegovine Kožo Mersudin i Mujković Dževida/.

Pozivam premijera Bosansko-podrinjskog kantona Goražde da nam iznese stav Vlade po predloženim amandmanima.

Vlada Bosansko-podrinjskog kantona Goražde prihvatila je Amandman g-dina Borović Mensuda i dodat će se kao zadnja alineja člana 6. pomenutog Zakona.

Amandman Kluba poslanika Stranke za Bosnu i Hercegovinu da se u članu 13. umjesto 3%, stavi 4% Vlada Bosansko-podrinjskog kantona Goražde nije prihvatila, jer kada smo predlagali Zakon onda smo računali na moguća finansijska sredstva. Svi oni koji su registrovani poljoprivredni proizvođači, znači to je radno mjesto, zanimanje, kako u 2010. godini tako i u cijelom periodu DOB-a, znači do 2012. godine za sve njih koji to učine Vlada će iz budžetskih sredstava platiti doprinose na platu koje poljoprivredni proizvođač obezbijedi. Time će se praktično svima omogućiti da bude kompeziran ovaj dio u procentu, a stvoriti pretpostavke da zajedno napravimo jedan iskorak, i da možemo napraviti i monitoring da vidimo da li ta sredstva daju efekte i da na bazi toga šta kaže izvještaj iz monitoringa pravimo strategiju i taktiku s jedne strane i s druge strane, čini mi se da je u članu 30. rečeno da će u roku od 30 dana programe sačiniti Ministarstvo, da Ministarstvo sačini prijedloge ko su nosioci razvoja poljoprivrede, a tu govorimo i o zadrugama, zadrugarstvu i svemu onome što resorno Ministarstvo predloži Vladi kao mjeru da znamo ušta treba ulagati i putem kojih organizacija to provesti.

/Sjednici prisustvuje 23 poslanika/

Dalje, u diskusiji su učestvovali: Turčalo Mehmed i Begović Alija.

Pošto se niko više ne javlja za riječ, zaključujem raspravu na Prijedlogu Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde i stavljam na glasanje Amandman Kluba poslanika Stranke za Bosnu i Hercegovinu.

Ko je za, molim, da digne ruku? /10 poslanika/

Ima li neko protiv? /Niko/

Da li se neko uzdržao od glasanja? /13 poslanika/

Konstatiram da Skupština Bosansko-podrinjskog kantona Goražde sa 10 glasova „za“, niti jednim „protiv“ i 13 „uzdržanih“ glasova nije prihvatila Amandman Kluba poslanika Stranke za Bosnu i Hercegovinu.

Stavljam na glasanje Prijedlog Zakona o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde sa prihvaćenim Amandmanom g-dina Mensuda Borovića od strane Vlade Bosansko-podrinjskog kantona Goražde.

Ko je za, molim, da digne ruku? /14 poslanika/  
Ima li neko protiv? /Niko/  
Da li se neko uzdržao od glasanja? /9 poslanika/

Konstatiram da je Skupština Bosansko-podrinjskog kantona Goražde sa 14 glasova „za“, niti jednim protiv i 9 „uzdržanih“ glasova donijela Zakon o novčanim podsticajima u primarnoj poljoprivrednoj proizvodnji i ruralnom razvoju na području Bosansko-podrinjskog kantona Goražde.

#### **Tačka 4.-**

Prelazimo na 4-tu tačku dnevnog reda: Nacrt Zakona o vodama Bosansko-podrinjskog kantona Goražde.

**Bašić Redžo** – predsjednik Komisije za urbanizam, prostorno uređenje, stambeno-komunalnu politiku, infrastrukturu i zaštitu okoline Skupštine Bosansko-podrinjskog kantona Goražde

Komisija za urbanizam, prostorno uređenje, stambeno-komunalnu politiku, infrastrukturu i zaštitu okoline Skupštine Bosansko-podrinjskog kantona Goražde, na sjednici održanoj 12. novembra 2009. godine, razmatrala je Nacrt Zakona o vodama Bosansko-podrinjskog kantona Goražde, pa je na osnovu člana 33. stav 4. i člana 42. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, donijela slijedeći:

#### **Z a k l j u č a k**

Nacrt Zakona o vodama Bosansko-podrinjskog kantona Goražde dobra je osnova za vodjenje rasprave.

Predlaže se Skupštini Bosansko-podrinjskog kantona Goražde da utvrdi Nacrt Zakona o vodama Bosansko-podrinjskog kantona Goražde i uputi ga na javnu raspravu koja će se obaviti u roku do 60 dana.

Zadužuje se Ministarstvo za privredu Bosansko-podrinjskog kantona Goražde da, u okviru rasprave na sjednici Skupštine i javnih rasprava, razmotri sve prijedloge i sugestije koje budu izrečene po Nacrtu Zakona o vodama Bosansko-podrinjskog kantona Goražde.

U diskusiji po Nacrtu Zakona o vodama Bosansko-podrinjskog kantona Goražde, učestvovao je: Bašić Redžo.

/Sjednici prisustvuje 21 poslanik/

**Begović Alija** – predsjedavajući Skupštine

Pošto se niko više ne javlja za riječ zaključujem raspravu po Nacrtu Zakona o vodama Bosansko-podrinjskog kantona Goražde i predlažem da Skupština Bosansko-podrinjskog kantona Goražde donese slijedeći:

## Z a k l j u č a k

1/ Utvrđuje se Nacrt Zakona o vodama Bosansko-podrinjskog kantona Goražde i upućuje na javnu raspravu.

2/ Javnu raspravu sprovest će Ministarstvo za privredu, Ustavna i zakonodavno-pravna komisija, Komisija za privredu i ekonomsku politiku, Komisija za urbanizam, prostorno uređenje, stambeno-komunalnu politiku, infrastrukturu i zaštitu okoliša Skupštine Bosansko-podrinjskog kantona Goražde,

3/ Javnu raspravu sprovesti sa svim zainteresovanim institucijama i građanima u sve tri općine u sastavu Bosansko-podrinjskog kantona Goražde: Općini Goražde, Općini Pale-Prača i Foča-Ustikolina.

4/ Rok za sprovođenje javne rasprave je do 60 dana

5/ Predlaže se Ministarstvu za privredu Bosansko-podrinjskog kantona Goražde, da u okviru sprovođenja javne rasprave, uzme u obzir i diskusije iznesene na sjednici Skupštine po Nacrtu predmetnog Zakona.

Ko je za ovakav zaključak, molim, da digne ruku? /22 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 22 glasa „za“ usvojila predložene zaključke.

## Tačka 5.-

Prelazimo na 5-tu tačku dnevnog reda: Nacrt Zakona o visokom obrazovanju Bosansko-podrinjskog kantona Goražde.

**Turčalo Mehmed** – predsjednik Komisije za obrazovanje, kulturu, informisanje i sport Skupštine BPK-a Goražde

Komisija za obrazovanje, kulturu, informisanje i sport Skupštine Bosansko-podrinjskog kantona Goražde je predložila da ovaj Zakon ide u redovnu skupštinsku proceduru.

U diskusiji po Nacrtu Zakona o visokom obrazovanju Bosansko-podrinjskog kantona Goražde, učestvovao je Žuga Damir.

/Sjednici prisustvuje 21 poslanik/

Pošto se niko više ne javlja za riječ, zaključujem raspravu po Nacrtu Zakona o visokom obrazovanju Bosansko-podrinjskog kantona Goražde i predlažem da donesemo slijedeći:

## Z a k l j u č a k

1/ Utvrđuje se Nacrt Zakona o visokom obrazovanju Bosansko-podrinjskog kantona Goražde i upućuje na javnu raspravu.

2/ Javnu raspravu sprovest će Ministarstvo za obrazovanje, nauku, kulturu i sport BPK-a Goražde, Ustavna i zakonodavno-pravna komisija i Komisija za obrazovanje, kulturu, informisanje i sport Skupštine Bosansko-podrinjskog kantona Goražde,

3/ Javnu raspravu sprovesti sa svim zainteresovanim institucijama i građanima.

4/ Rok za sprovođenje javne rasprave je do 60 dana

5/ Predlaže se Ministarstvu za obrazovanje, nauku, kulturu i sport Bosansko-podrinjskog kantona Goražde, da u okviru sprovođenja javne rasprave, uzme u obzir i diskusije iznesene na sjednici Skupštine po Nacrtu predmetnog Zakona.

Ko je za ovakav zaključak, molim, da digne ruku? /21 poslanik/  
Ima li neko protiv? /Niko/  
Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 22 glasa „za“ usvojila predložene zaključke.

#### **Tačka 6.-**

Prelazimo na 6-tu taču dnevnog reda: Nacrt Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde.

Obrazloženje po Nacrtu Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde dao je ministar za finansije gđin Muhidin Pleh, a u diskusiji je učestvovao: Bašić Redžo.

Pošto se niko više ne javlja za diskusiju, zaključujem raspravu po Nacrtu Zakona o pripadnosti javnih prihoda u Bosansko-podrinjskom kantonu Goražde i finansiranju Bosansko-podrinjskog kantona Goražde i predlažem da Skupština Bosansko-podrinjskog kantona Goražde donese slijedeći:

#### **Z a k l j u č a k**

1/ Utvrđuje se Nacrt Zakona o pripadnosti javnih prihoda u Bosansko-podrinjskom kantonu Goražde i upućuje na javnu raspravu.

2/ Javnu raspravu sprovest će Ministarstvo za finansije, Ustavna i zakonodavno-pravna komisija i Komisija za budžet, finansije i administrativna pitanja Skupštine Bosansko-podrinjskog kantona Goražde.

3/ Javnu raspravu sprovesti sa svim zainteresovanim institucijama i građanima u sve tri općine u sastavu Bosansko-podrinjskog kantona Goražde: Općini Goražde, Općini Pale-Prača i Općini Foča-Ustikolina.

4/ Rok za sprovođenje javne rasprave je do 60 dana.

5/ Predlaže se Ministarstvu za finansije Bosansko-podrinjskog kantona Goražde, da u okviru sprovođenja javne rasprave, uzme u obzir i diskusije iznesene na sjednici Skupštine po Nacrtu predmetnog Zakona.

Ko je za, molim, da digne ruku? /22 poslanika/  
Ima li neko protiv? /Niko/  
Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 22 glasa „za“ usvojila predložene zaključke.

#### **Tačka 7.-**

Prelazimo na 7-mu tačku dnevnog reda: Prijedlog Odluke o davanju saglasnosti Premijeru Bosansko-podrinjskog kantona Goražde za zaključivanje Ugovora o kreditnom aranžmanu sa NLB Tuzlanskom bankom d.d. Tuzla.

**Kurtović Mustafa** – ministar za privredu u Vladi Bosansko-podrinjskog kantona Goražde

Na osnovu mišljenja dobrog broja privrednika sa područja Bosansko-podrinjskog kantona Goražde i drugih ljudi koji poznaju ovu problematiku u sektoru bankarstva došli smo do

saznanja da bi trebalo još jednom, Ministarstvo za finansije posebno u saradnji sa Razvojnou bankom i drugim bankama, da se odloži donošenje ovakve Odluke i da se pokuša iznaći još povoljnija varijanta u smislu podrške privredi Bosansko-podrinjskog kantona Goražde.

**Begović Alija** – predsjedavajući Skupštine

Pravo je predlagača da predloži da se rasprava po ovoj Odluci odgodi. U tom slučaju nemamo potrebu raspravljati, budući da je predlagač predložio da se ova Odluka povuče sa današnje sjednice Skupštine.

#### **Tačka 8.-**

Prelazimo na 8-mu tačku dnevnog reda: Prijedlog Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine.

Obrazloženje po Prijedlogu Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine dala je ministrica za obrazovanje, nauku, kulturu i sport Delizaimović Alma.

**Turčalo Mehmed** – predsjednik Komisije za obrazovanje, kulturu, informisanje i sport Skupštine Bosansko-podrinjskog kantona Goražde

Komisija je, u saradnji sa Ministarstvom za obrazovanje, nauku, kulturu i sport, utvrdila prijedlog Zaključaka koje ste dobili za ovu sjednicu Skupštine.

U diskusiji po Prijedlogu Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine, su učestvovali: Džemidžić Envera, Obuća Bajro, Žuga Damir, Adžem Memsur, Borović Mensud, Kumro Mesud, Terović Dževad i Agović Adis.

**Begović Alija** – predsjedavajući Skupštine

Pošto se niko više ne javlja za riječ zaključujem raspravu po Prijedlogu Zaključaka po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine predlažem da Skupština Bosansko-podrinjskog kantona Goražde donese slijedeći:

#### **Z a k l j u č a k**

Zadužuju se Ministarstvo za obrazovanje, nauku, kulturu i sport Bosansko-podrinjskog kantona Goražde i Komisija za obrazovanje, kulturu, informisanje i sport Skupštine Bosansko-podrinjskog kantona Goražde da dopuni Zaključke po Analizi stanja u obrazovanju na području Bosansko-podrinjskog kantona Goražde sa 29-te redovne sjednice Skupštine održane 20. oktobra 2009. godine.

Zadužuje se Ministarstvo za obrazovanje, nauku, kulturu i sport Bosansko-podrinjskog kantona Goražde da uputi poziv svim zainteresovanim subjektima, da najkasnije do 30. novembra 2009. godine dostave, u pisanoj formi, svoje prijedloge zaključaka.

Ministarstvo za obrazovanje, nauku, kulturu i sport Bosansko-podrinjskog kantona Goražde i Komisija za obrazovanje, kulturu, informisanje i sport Skupštine Bosansko-podrinjskog kantona Goražde će razmotriti sve prispjele zaključke, kao i zaključke iznesene na 30-toj redovnoj sjednici Skupštine Bosansko-podrinjskog kantona Goražde i, eventualno, ugraditi u konačne Zaključke koje će ponuditi Skupštini Bosansko-podrinjskog kantona Goražde, na prvoj narednoj sjednici, na usvajanje.

Ko je za ovakav Zaključak, molim, da digne ruku? /21 poslanik/  
Ima li neko protiv? /Niko/  
Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 21 glasom „za“, usvojila predložene zaključke.

#### **Tačka 9.-**

Prelazimo na 9-tu tačku dnevnog reda: Informacija o radu Kantonalnog pravobranilaštva za 2008. godinu.

Obrazloženje po Informaciji o radu Kantonalnog pravobranilaštva za 2008. godinu dao je Kantonalni pravobranilac Delahmet Mensur.

**Bašić Redžo** – predsjednik Komisije za urbanizam, prostorno uređenje, stambeno-komunalnu politiku, infrastrukturu i zaštitu okoline Skupštine Bosansko-podrinjskog kantona Goražde

Obzirom da na prvoj stranici ove Informacije o radu za 2008. godinu Kantonalnog pravobranilaštva vidimo da Pravobranilaštvo Bosansko-podrinjskog kantona Goražde vrši poslove pravne zaštite imovine i imovinskih interesa Kantona, a imali smo i Informaciju vezanu za problematiku potkrovnih stanova u Goraždu ul. Maršala Tita, Jusufa Duhovića i Meha Drljevića, u ime Komisije predlažem slijedeći:

#### **Z a k l j u č a k**

Predlaže Skupštini Bosansko-podrinjskog kantona Goražde da obaveže Vladu Bosansko-podrinjskog kantona Goražde i Kantonalno pravobranilaštvo da preduzmu mjere na rješavanju definitivnog statusa potkrovnih stanova u ulicama Maršala Tita, Jusufa Duhovića i Meha Drljevića u Goraždu i da Skupštinu Bosansko-podrinjskog kantona Goražde o preduzetim mjerama izvjesti u roku od 30 dana.

Dalje, u diskusiji po Informaciji o radu Kantonalnog pravobranilaštva za 2008. godinu učestvovali su: Frašto Emir, Žuga Damir, Džemidžić Envera, Delahmet Mensur Kantonalni pravobranilac, Begović Alija, Podrug Salko, Terović Dževad, Obuća Bajro, Turčalo Mehmed i Begović Alija predsjedavajući Skupštine.

Pošto se niko više ne javlja za riječ, stavljam na glasanje zaključak koji je predložio predsjednik Komisije za urbanizam, prostorno uređenje, stambeno-komunalnu politiku, infrastrukturu i zaštitu okoline Skupštine Bosansko-podrinjskog kantona Goražde, koji bi ja samo malo preformulisao i koji bi glasio:

/Sjednici Skupštine prisustvuje 19 poslanika/

Skupština Bosansko-podrinjskog kantona Goražde obavezuje Vladu Bosansko-podrinjskog kantona Goražde i Kantonalno pravobranilaštvo da preduzmu mjere na rješavanju definitivnog statusa potkrovnih stanova u ulicama Maršala Tita, Jusufa Duhovića i Meha Drljevića u Goraždu i da Skupštinu Bosansko-podrinjskog kantona Goražde o preduzetim mjerama izvjesti u roku od 30 dana.

Ko je za ovakav Zaključak, molim, da digne ruku? /19 poslanika/  
Ima li neko protiv? /Niko/  
Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 19 glasova „za“ usvojila predloženi Zaključak.

### **Tačka 10.-**

Prelazimo na 10-tu tačku dnevnog reda: Informacija o utrošku sredstava po Programu „Podsticaj za poljoprivredu“ za 2009. godinu za period od tri mjeseca /01. 06. – 01. 09. 2009. godine/.

Objasnjeno po Informaciji o utrošku sredstava po Programu „Podsticaj za poljoprivredu“ za 2009. godinu za period od tri mjeseca /01. . 06. – 01. 09. 2009. godine/ dao je ministar za privredu Mustafa Kurtović, a u diskusiji su učestvovali: Žuga Damir, Frašto Emir, Kurtović Mustafa ministar za privredu.

Pošto se niko više ne javlja za riječ, zaključujem raspravu po Informaciji o utrošku sredstava po Programu „Podsticaj za poljoprivredu“ za 2009. godinu za period od tri mjeseca /01. 06. – 01. 09. 2009. godine/ i konstatiram da je ista primljena k znanju.

### **Tačka 11.-**

Prelazimo na 11-tu tačku dnevnog reda: Informacija o preduzetim aktivnostima u vezi rješavanja problematike Mljekare “Milgor” d.o.o. Goražde.

Objasnjeno po Inforamciji o preduzetim aktivnostima u vezi rješavanja problematike Mljekare “Milgor” d.o.o. Goražde dao je ministar za privredu Mustafa Kurtović, a u diskusiji je učestvovao predsjedavajući Skupštine Begović Alija.

/Sjednici prisustvuje 21 poslanik/

Pošto se niko više ne javlja za riječ, zaključujem raspravu po Inforamciji o preduzetim aktivnostima u vezi rješavanja problematike Mljekare “Milgor” d.o.o. Goražde i predlažem da Skupština usvoji slijedeći:

### **Z a k l j u č a k**

Prima se k znanju Informacija o poduzetim aktivnostima u vezi rješavanja probelmatike Mljekare “Milgor” d.o.o. Goražde.

Traži se Vlade Bosansko-podrinjskog kantona Goražde da hitno formira Ekspertni tim sačinjen od eksperata pravnika, ekonomista i tehnologa koji će predložiti Skupštini Bosansko-podrinjskog kantona Goražde rješenje za Mljekaru “Milgor” d.o.o. Goražde najkasnije u roku od 30 dana.

Ko je za ovakav zaključak, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /1 poslanik/

Konstatiram da je Skupština Bosansko-podrinjskog kantona Goražde sa 20 glasova „za“ i 1 „uzdržanim“ glasom usvojila predloženi zaključak.

### **Tačka 12.-**

Prelazimo na 12-tu tačku dnevnog reda: Informacija o stanju iz oblasti prometa i komunikacija na području Bosansko-podrinjskog kantona Goražde.

Objasnjeno po Informaciji o stanju iz oblasti prometa i komunikacija na području Bosansko-podrinjskog kantona Goražde dao je ministar za privredu Kurtović Mustafa, a u diskusiji su

učestvovali: Kumro Mesud, Frašto Emir, Turčalo Mehmed, Dozo Hasan, Begović Alija, Borović Mensud, Podrug Salko, Obuća Bajro, Terović Dževad, Bašić Redžo i Kurtović Mustafa ministar za privredu.

Pošto se niko više ne javlja za riječ, zaključujem raspravu i konstatiram da je Skupština Bosansko-podrinjskog kantona Goražde primila k znanju Informaciju o stanju iz oblasti prometa i komunikacija na području Bosansko-podrinjskog kantona Goražde.

### **Tačka 13.-**

Prelazimo na 13-tu tačku dnevnog reda: Prijedlog Odluke o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde.

/Sjednici prisustvuje 20 poslanika/

**Obuća Bajro** – predsjednik Komisije za izbor i imenovanja Skupštine Bosansko-podrinjskog kantona Goražde

Na osnovu člana 186. Poslovnika Skupštine Bosansko-podrinjskog kantona Goražde kada su u pitanju razrješenja i imenovanja iz nadležnosti Skupštine, glasa se pojedinačno, a mi smo predložili jednu Odluku o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde i ona je na kraju. Dakle, uslov da dodjemo do Odluke je da Skupština prihvati prije toga razrješenja i imenovanja.

Znači, treba najprije da se obavi razrješenje Mulaosmanović Amine člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde, na lični zahtjev.

**Begović Alija** – predsjedavajući Skupštine

Ko je za, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 20 glasova „za“ donijela Odluku o razrješenju g-đe Amine Mulaosmanović člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde, na lični zahtjev.

**Obuća Bajro** – predsjednik Komisije za izbor i imenovanja Skupštine Bosansko-podrinjskog kantona Goražde

Komisija za izbor i imenovanja predlaže da se umjesto Mulaosmanović Amine za člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde imenuje Hasković Ferid.

**Begović Alija** – predsjedavajući Skupštine

Ko je za, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 20 glasova „za“ donijela Odluku o imenovanju Hasković Ferida za člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde.

**Obuća Bajro** – predsjednik Komisije za izbor i imenovanja Skupštine Bosansko-podrinjskog kantona Goražde

Komisija za izbor i imenovanja Skupštine Bosansko-podrinjskog kantona Goražde predlaže da se Husejnović Almir razriješi člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde, na lični zahtjev.

**Begović Alija** – predsjedavajući Skupštine

Ko je za, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 20 glasova „za“ donijela Odluku o razrješenju Husejnović Almira člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde, na lični zahtjev.

**Obuća Bajro** – predsjednik Komisije za izbor i imenovanja Skupštine Bosansko-podrinjskog kantona Goražde

Komisija za izbor i imenovanja Skupštine Bosansko-podrinjskog kantona Goražde predlaže da se umjesto Husejnović Almira za člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde imenuje Aganović Edin.

**Begović Alija** – predsjedavajući Skupštine

Ko je za, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 20 glasova „za“ donijela Odluku o imenovanju Aganović Edina za člana Komisije za rad, zdravstvenu i socijalnu zaštitu Skupštine Bosansko-podrinjskog kantona Goražde.

**Obuća Bajro** – predsjednik Komisije za izbor i imenovanja Skupštine Bosansko-podrinjskog kantona Goražde

Komisija za izbor i imenovanja Skupštine Bosansko-podrinjskog kantona Goražde predlaže da Skupština Bosansko-podrinjskog kantona Goražde donese Odluku o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde.

Ko je za, molim, da digne ruku? /20 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatiram da je Skupština Bosansko-podrinjskog kantona Goražde, jednoglasno, sa 20 glasova „za“ donijela Odluku o izmjenama i dopunama Odluke o izboru stalnih i povremenih radnih tijela Skupštine Bosansko-podrinjskog kantona Goražde.

Pošto je dnevni red iscrpljen predsjedavajući Skupštine zaključio je 30-tu redovnu sjednicu Skupštine Bosansko-podrinjskog kantona Goražde u 18:05 sati.

**SEKRETAR SKUPŠTINE**

Bašić Midhat

**PREDSJEDAVAJUĆI SKUPŠTINE**

Begović Alija